

Fa lèse mè mbe nfè' nger yi mì mè ka'

- ¹ Oo Yawè, mè sùrni njep wè,
fa mà'shi te rètu yi koo mè ka'.
- ² Jà' mè fur mè embà mmbo ya ngãa bbàa njobè' wè yu nrara,
yu' mè, ja' mè.
- ³ Ba nè mè à ryεε rte'shì ce m be ce caŋ dù sùrni àfo,
wè làa ene à be jà' mè
njobè' à yu la ryεε, à ba wè ce wε ke kèŋte mè.
- ⁴ Oo yà Nyù, fur mè embà mmbo ngãa ngèe buu bbebepe,
fur mè embà mmbo ngãa mnàŋ ba bée bbebepe.
- ⁵ Oo Yawè, mè fòosi nè wè,
Oo Yawè, mè fòosi nè wè ke' ese à ghàŋwè.
- ⁶ Mè m ye'ti nyor nje wè te a ka' bi mè,
a wè ce wè m fur mè enje rbù yà mâ,
m be nèsi wè à nfè' wεεwε.
- ⁷ A mè rdùŋshì nè bée gòr,
njobè' a wè ce wε ke kèŋte mè sê.
- ⁸ Mε ke kù'si wè à nfè' wεεwε,
ce suŋ àmbò yo fòo à mnòŋ wεεwε.
- ⁹ Fa mà' mè mbe nfè' ce m yu à nleeŋwè ka',
mà'shi mè mbe nfè' ce nger yi mì mè wεε ka'.
- ¹⁰ Ya ngãa bbàa a ce làa bebepe kuu mè,
bèe ce a ce ròo la ryòŋ a cu mncù a kuu mè.
- ¹¹ Wowèe a làa enê, “Nyù à lèse ye, sèe juu ye koo,
njobè' ŋwè mò' yu ce àde' e ja' ye ka'.”
- ¹² Oo Nyù, fa ba ànjisàp enè mè ka',
Oo ya Nyù, vù cercer vu ja' mè.
- ¹³ Coosi bèe ce a toshi mè, ker yushi wowèe,
coosi bèe ce a ce fa mè mlù, gee te rètu yi koo wowèe.
- ¹⁴ Geewa'a, m be fòosi nè wè à nfè' wεεwε,
kù ce nèsi wè ce dù kùntombi.
- ¹⁵ M be suŋ bèe àmbò mo mfã' mmbòŋmboŋ ce wè gèe,

kèr ce suŋ àmbò wè gèe wèr à luŋ à mnòŋtu' wɛɛwɛ,
njobè' vi yu ce àde' m be' ka'.

¹⁶ M be dù suŋ ku' buu bghagha' ce Yawè ce e yu Nyù à gèe,
m be kuushi wowèe enɛ ku ba wè cà'cà' ce à yu kùyɛɛ.

¹⁷ Oo Nyù, wè m ye'ni mè ke' e à ghàŋwè,
mè ku bii suŋ bèe yò buu bbèe ce à ce gèe ba' ntini.

¹⁸ Oo Nyù, ka' mbe nfè' m yu à nleeŋwè, tu yi fɔp mè,
fa lèse mè ka' caar tɛ m suŋ àmbò yo ŋger nè ŋgù bèe ce a ce vù embe mǎ nji,
suŋ yo ŋger nè ŋgù bèe wɛɛwɛ ce a bii vù embe mǎ nji.

¹⁹ Oo Nyù, yò rara yu ce àde' ŋwè suŋ ka',
Oo Nyù, wè ce wè gèe buu bbèe, ŋwè ce e yu àmbò wè a nda?

²⁰ Wè ce wè gèe mè ye ku' ŋge' ba mlù,
à be kèr fɔr mè enjo,

à be kè fɔr mè
enjɛp rshè, kèr fa mè ryòŋ.

²¹ À be kèse wa bkù',
kèr bòosi mè,

²² Oo yà Nyù, m be bu' rluŋ ce nèsi wè àgho foŋ njobè' à yu mini,
Oo Nyù bèe Isrèl ce à yu nrara,
m be yòp ce nèsi wè nè rluŋ.

²³ M be waa, ce lu'shi à nfè' ce m ce yòp à rnèsi wè,
la ryòŋ ce wè tee efa rkwe li be yòp foŋ.

²⁴ M be ce suŋ bèe à mnòŋtu' wɛɛwɛ enɛ wɛ ke gèe buu kùyɛɛ,
njobè' wè coosi bèe ce a m ce ghèter à ryù mè a ker jepsi wowèe.

72 Gèe tɛ ɲkɯɯ ce sa' kùyeɛ

- ¹ Oo Nyù, gèe tɛ ɲkɯɯ ce sa' kùyeɛ,
gèe tɛ (muu) ɲkɯɯ ce sa' rsa' rrara.
- ² Jà' ye tɛ e sa' yò bèe kùyeɛ,
sa' yo ɲgãa fùp yɛɛni.
- ³ M ce loo mɛnɛ à gèe tɛ byee vi fɯɯ enjep nshè nè bèe yɛɛni,
ɲjobè' ɲkɯɯ ce sa' yɛɛni.
- ⁴ M ce loo mɛnɛ tɛ ɲkɯɯ re nè ɲgãa fùp efa mù bèe,
ja' boo bèe ce a buu yuu,
ker so bèe ce a ce nyù' wowèe.
- ⁵ M ce loo mɛnɛ bèe a yu'ni nè wè nfesè àmbò nyù ce saɲ,
ker ba àmbò ɲwɛɛ yi ce saɲ.
- ⁶ M ce loo mɛnɛ tɛ rsa' ɲkɯɯ li ba àmbò mbèɲ ce e gwè mbendù mnjɛɛ ce a ku cɛmi
còɲcòɲ wa'a,
ba àmbò mbèɲ ce e ce ɲwanɲwan à ɲgònɲ wa'a.
- ⁷ M ce loo mɛnɛ tɛ bɛɛ byɛɛni a ku' à buu mbe yi nfè' rsa',
tɛ cumɲnyaɲ ba àgho nfesè.
- ⁸ M ce loo mɛnɛ tɛ e sa' ke' ekùm̀b̀ùunti du ba' mb̀àmb̀ùunti,
ke' e à Rdip Yufretis du ba' f̀àd̀i' ɲgònɲ yi tɛɛ.
- ⁹ M ce loo mɛnɛ bèe ce a ce cu à nteerèɲ a gushi nè ye,
tɛ e so yi ɲgãa bbàa.
- ¹⁰ M ce loo mɛnɛ tɛ bkɯɯ e à ɲgõɲ Tashish ba bkɯɯ e àwãa rò a shwi ye,
tɛ bkɯɯ e Shɛbà ba Sɛbà a fa ye buu.
- ¹¹ Bkɯɯ wɛɛwɛ a be kè gu'shi nè ye,
tɛ bèe e à bto' wɛɛwɛ a fa' nè ye.
- ¹² D̀wè ce e bu yuu e ke war nè ye, e ja' ye,
ja' ɲwè fùp ba ɲwè ce e tɹ ɲwè ce e ja' ye ka'.
- ¹³ E kosimnse nè bèe ce a yu bk̀èeti ba bèe ce a buu yuu,
ja' bèe ce a buu yuu.
- ¹⁴ E be fɹr wowèe embà mmbo bèe ce a ce nyù' wowèe a ker ce fa ɲge' nè wowèe,
myòɲ bèe anà mi yu à lulu nè ye.
- ¹⁵ M ce loo mɛnɛ ɲkɯɯ cu à ɲgònɲ tètè,
tɛ a fa ye gul e à ɲgõɲ Shɛbà.

M ce loo mɛnɛ bɛɛ a ce loo nɛ ye à nfɛ' wɛɛwɛ,
ce loo ɛnɛ a ghoni ye à mnòŋ wɛɛwɛ.

¹⁶ M ce loo mɛnɛ tɛ kwaa yaa à ŋgòŋ,
ce ku' à tu mntùu,

ce ku' àmbò bce ce vi kù' à ŋgòŋ Lɛbanòn wa'a,
tɛ bɛɛ a maa à mlà' àmbò mnjɛɛ mĩ à mŋkù wa'a.

¹⁷ M ce loo mɛnɛ tɛ li rlii li cu nfesè,
tɛ yi kuu yi ku dù ba kùntombi caar tɛ ŋgòŋ yi ke mì! /

M ce loo mɛnɛ tɛ bɛɛ a koni bghòni nji enjɛp ye,
tɛ bɛɛ e à bto' wɛɛwɛ a too ye ɛnɛ ŋwɛ mmbõŋtu.

¹⁸ Bkù'si vi ba nɛ Yawè ce e yu Nyù bɛɛ Isrèl,
ce ku ba ye ce e gèe buu bghagha'.

¹⁹ Bɛɛ a ku'si li rlii ce li yu rgòr nfesè,
tɛ yi fòò yi ruu à ŋgòŋ bìi.

Yi yu wa'a, èno yi yu wa'a.

²⁰ Mloo Dɛvid ce muu Jɛsì mi mì mbena.

73 Nyù e ke sa' li rsa' kùyye

- ¹ Nè mini—nyè, Nyù à bòn nè bée Isrèl,
a boṅ nè bée ce wap mntee vi yu brara.
- ² À ka' ba yi àmbò mè, mè m ce seni kote,
a sɛɛ a ce tà' gwè.
- ³ Yi m ba wa'a njobè' mè m ce ko'ndon nè ngăa nàanyor,
mbe nfè' mè m ye àmbò bée bbebep a ce kù' à buu.
- ⁴ Wowèe a ke ye nge' ka', caar ca kwe,
wowèe a kù'nger a ba nè nger—nyè.
- ⁵ Wowèe a ke ye nge' àmbò bée mo' a ke ye ka',
mlù mi ke jòo wowèe àmbò bɛr bée ka'.
- ⁶ A mbùu ce yàp nàanyor yu àwaṅ àmbò càṅ ce nyè a yar wa'a,
yap ngěe ntambaṅ yi te'shi wowèe àmbò cè' ce nyè à yar wa'a.
- ⁷ Ku ce fuu ba buu bbebep enjep wap mntee,
wap mntee vi ruu nè buu bbebep/wowèe a ku ce kwà'shi ba buu bbebep.
- ⁸ Wowèe a mà' bée nè blàa, ce de' nè ntee bebep,
wowèe a ce ghoo ntaṅ à rnyù'si bée nè nàanyor—nyè.
- ⁹ Wowèe a ce de'/lâa bebep àmbò Nyù embe bùu,
ce làa bebep nè bée enjep ngòn.
- ¹⁰ A mbùu ce bée Nyù a dù a wăp mbù,
a ke' ce ye yuu bebep mo' njep wowèe ka'.
- ¹¹ Wowèe a ce làa enê, “Àde' Nyù riṅ à njěe ke?
Wà' Nyù ce e tur nger wɛɛwɛ à tur bfee a?”
- ¹² Yê, a mbò bée bbebep a yu enê/wa'a,
wowèe a yu yɛni à nfè' wɛɛwɛ, a ce kù' à buu.
- ¹³ Mè lè ya ntee rara à cici,
a ka yà njo enɛ mè gèe ya yu yuu mo' bebep ka'.
- ¹⁴ Oo Nyù, m yu à mlù à mnòn wɛɛwɛ,
wě fa mè nge' à ngàptu' wɛɛwɛ.
- ¹⁵ Mè m ba laa enê, “M be làa wa'a,”
mè m ba fyèni ngù bée boo wo.
- ¹⁶ Geewa'a, mè ka' ce kwà'shi àgho enɛ m bo riṅ,
yi gha' mè,
- ¹⁷ caar mè du mbe ndàp Nyù,

awε, a riη àmbò yàp lùsimbùu.

¹⁸ Nè mini—ηwè wè lè wowèe à bdi' ce vi ce sεηger,
a gee wowèe a gwèηgèr, a kwεηger.

¹⁹ Yε àmbò a bepsi wowèe à mutèr,
bwεp vi si'si wowèe dùdù!

²⁰ Wowèe a yu àmbò rlo ce ηwè à ye,
e le' lese wa'a,

Oo Yawè, wε lò nàti fuse wowèe.

²¹ Mbe nfè' ce mè m ce yu' ryan,
mbe nfè' ntee yi m bep mè,

²² mè m ce jèηte, a riη yuu ka',
mè m ba nè wè àmbò nyàa wa'a.

²³ Ka yi yu wa'a, m ku ba wèe sò,
wè ghashi mè à bo mà'.

²⁴ Wè kèηte mè nè yò ncep,
lò koo mè mbe fòo.

²⁵ Mè tur ba nda mbe bùu caa efa wè?
Mè ker koη yuu mo' njep ηgòη na caa efa wè ka'.

²⁶ Àde' ya kùpnyor ba ya ntee vi sê,
geewa'a, Nyù a ηwè ce e fa mè ηger,
à ba ye yuu ce mǎ ròo nfesè.

²⁷ Nè mini—ηwè, bèe ce a yu ànjisàp efa wè, a be kwεηger,
Wε ke bepsi ηwè wεεwε ce e yu mini nè wè ka'.

²⁸ À ka' ba yi àmbò mè, yi bòn à rba àtutu nè Nyù,
mè gèe Yawè ce Nyù à ya di' sùrni,
te m bo suη àmbò mo mmfà' wεεwε.